

proprias frange, undique te cum apostolo Christi mortificatione præcinge; undique impressa tibi stigmata crucis ostende, ut quo nunc arctius iudicati vestigia sequeris, eo post sublimius iudicantis consortio perfruaris. Omnes autem sanctos fratres monasterii tui mea vice salutâ, charissimos autem

A mihi fratres, Boninum et Petrum, si solito more videris aliquando excelsius canere, hoc distichon meo nomine in eorum manibus pone:

Qui Philomelinis depromitis organa fibris,  
Intima vox cordis modulis bene concinat oris.

*Sit nomen Domini benedictum.*

## 767-768 OPUSCULUM QUINQUAGESIMUM.

### INSTITUTIO MONIALIS. AD BLANCAM EX COMITISSA SANCTIMONIALEM.

ARGUMENTUM. — Blancam nobilissimam feminam, quæ divitiis, liberis et charissimis rebus quibusque relictis, in monasterium Deo servitura secesserat, prudentissimis præceptis et salutaribus monitis instruit, quid fugiendum ei sit, quid appetendum, quasi digito monstrans. Ac primum quidem rudem adhuc et inexperiem spiritualium certaminum bellatricem, tanquam telo acerrimo, præmunit; dum eam hortatur ut paupertatem et angustias et tribulationes, quæ Deo militantibus perferendæ sunt, fortiter excipiat; et ita sibi persuadeat Deo dilectos variis in hoc mundo turbinibus tantisper exagitari, donec in felicissimæ patriæ portum ingressi, æterna tranquillitate fruantur. Tum verò eandem ad perfectiorem statum perducere cupiens, ad Deum amandum tota mentis contentione invitat. Deinde ad præcavendas dæmonis insidias, mortis contemplationis ei clypeum demonstrat. Adhuc validioribus armis eam induit, dum extremi iudicii imaginem ex sacræ Scripturæ penetralibus depromptam ante oculos proponit, et ut assidue meditetur, inflammat. Postremò, timoris præsidio satis et abunde vallatam ratus, per amoris viam rursus in patriam reducit ad felicitatem illius sempiternæ contemplationis, quam nec oculus vidit, nec auris audivit, nec in cor hominis ascendit.

BLANCÆ olim comitissæ, nunc cœlesti Sponso conjunctæ, PETRUS peccator monachus jubulum cordis in Spiritu sancto.

#### CAPUT PRIMUM.

*Blancam angustias et paupertatem fortiter excipere hortatur.*

Ad regales nuptias epulaturus accedo, thalamos auro gemmisque radiantibus adornatos videre desidero; nuptialibus saginari dapibus avidissime concupisco. Undique igitur mystica deferantur xenia; prophetica simul et apostolica non desint tam excellentibus nuptiis ornamenta. Evangelicus itaque noster Isaias jam procedat ad medium, et munificus exhibeat quod paravit, ornatum videlicet calceamentorum, lunulas, torques atque monilia, armillas et mitras, discriminalia et periscelidas, murenulas et olfactoriola, in aures et annulos et gemmas in fronte pendentes, mutatoria et pallia et linteamina, acus et specula et sindones, vittas atque theristra. Hæc igitur omnia spiritualibus conferenda sunt nuptiis, ac novæ sponsæ diligenter aptanda, quo veri Sponsi placere possit obtutibus. His nimirum infulis venustata, hac ornamentorum erat varietate composita regina illa, quam Psalmista contemplatus, aiebat: « Astitit regina a dextris tuis in vestitu deaurato, circumamicta varietate (Psal. XLIV). » Nuptiæ factæ sunt in Cana Galilææ: et sicut Evangelista testatur, vocatus est Jesus ad nuptias cum discipulis suis (Joan. II); sed tanquam pronubus, non ut sponsus; quasi pransurus; non ut nupturus. Istæ vero nuptiæ tanto illas privilegio superant, ut hic Jesus jure credatur non amicus esse, sed sponsus. Et quoniam qui adhæret Domino (I Cor. VI) unus spiritus est, sponsus iste non modo sponsæ jungitur, sed unitur, atque ex hac cōpula non cor-

ruptio nascitur, sed integritatis potius clausulâ reparatur. Illic Jesus aquam convertit in vinum; hic item Jesus et vinum semelipsum fecit et cibum. Cibum videlicet, quia ipse est panis vivus qui de cœlo descendit (Joan. VI); vinum vero quod hauriat cor hominis (Psal. CV); Spiritus ejus est de quo iterum dicit: « Poculum tuum inebrians, 769 quam præclarum est! » (Psal. XXII.) Spiritus enim Dei hominum mentes inebriat, ut, tanquam a suis sensibus alienati, divitias hujus mundi, honores et gloriam respuant, ad subcundâ vero pro Deo quæque dura vel aspera flammantibus desideriis inardescant. Hoc musto deebriati fuerant quibus Judæi vere dementes ac furiosi dicebant: « Musto pleni sunt isti (Act. II). » Hoc musto plenus erat vir ille de filiis prophetarum, quem ad augendum Hieu regem miserat Eliseus, de quo dixerunt vesane sapientes ad eum: « Quid venit insanus iste ad te? » (IV Reg. IX.) Quid autem mirum si hi, qui pari sunt homines, cum Spiritu divino replentur, ab hujus mundi sapientibus, atque ideo vere desipientibus, judicentur insani? cum et ipse qui magister est angelorum dictus sit habuisse dæmonium (Joan. VIII); imo, ut Marcus evangelistâ testatur, æstinatus sit etiam fuisse phreneticus: « Venit, inquit, domum, et convenit iterum turba; ita ut non posset nec panem manûcare; et cum audissent sui, exierunt tenere eum: dicebant enim; quoniam in furorem versus est (Marc. III). » Hanc sancti Spiritus ebrietatem et tu, o venerabilis domina, sana mente conceperas cum sæculum relinquere decrevisti: et, velut columbæ simplicis alas excutens, ad innocentium atque simplicium nidulum convolasti; tunc dicens: « Quis dabit mihi pennas sicut columbæ, et volabo, et requiescam? » (Psal.

LIV.) Nunc etiam secure decantans : « Ecce elongavi fugiens, et mansi in solitudine, exspectans eum, qui me salvam faciat a pusillanimitate spiritus, et tempestate (Psal. LIV). » Hæc te nimirum ebrietas impulit ampla satis atque uberrimis fecunda proventibus jura contemnere, munita turrium atque castrorum propugnacula declinare, dulcium propinquorum necessitudinem ac vernaculorum affectus abjicere, quodque horum omnium permæximum est, unicum filium, eumque ephæbum adhuc atque imuberem, sine conjugalis solatio fœderis abdicare, et, quæ constipatis vallata clientum cuneis solebas incedere, jam didicisti in angulo monasterii cum pauperibus Spiritus sancti mulieribus humiliter residere. Hæc te sobria, ut ita loquar, ebrietas docuit ut pro carbasinis lanea, pro purpureis atque nitidulis pulla ac despicabilia eligeres indumenta. Hæc te persuasit ebrietas ut siligineas pollines ac fercula dapibus referta postponeres, atque ad libræ pensilem te mensuram panis cibarii cohiberes. Hæc te plane perita et pædica ebrietas incitavit ut, cum primo adolescentiæ flore frueris, viro obeunte relicta, non tam claris tamque magnificis precis annueres, non, ut omnia videbantur hortari, thalamos iterares; sed, soli jam Christo victuram; mundo te mortuam exhiberes. Enimvero, tanquam perita negotiatrix nundinis intenta venalibus, projecisti mundum, ut acquirereres cælum; prævenisti mortem, ut sententiam mortis evaderes; elegisti pauperiem, ut divitiarum non pereuntium copiam possideres.

## 770 CAPUT II.

*Quod aliquando justis ab injustis idcirco permittuntur affligi, ut statuant ad Deum vel ex necessitate converti.*

Atqui, ut mirabilior tuâ videatur esse conversio, non te mundus a se repulit, sed solus ardor divini Spiritus incitavit. Enimvero, sicut providentia divina disposuit ad educendum de Ægypto Israeliticum populum (Exod. III), tunc est Moyses missus, cum jam Pharaon ad opprimendum illum duris operibus fuerat excitatus, quatenus Israelitarum mentes Ægypto deformiter inhærentes, alius dum vocaret, quasi traheret; alius velut impelleret, dum sæviret, ut dum plebs in servilio turpiter figitur, vel malis impulsâ, vel bonis provocata moveatur. Hoc etiam in populo Dei frequentius agitur, cum, prædicatis cœlestibus præmiis, sævire in electos reprobi permittuntur; ut si, vocati, ad terram promissionis, exire negligimus, pressuris saltem sævientibus impellamur. Atque hæc Ægyptus, vita videlicet præsens, quæ nos oppressit blandiens, adjuvet premens; quatenus, quæ, dum foveret, jugo nos servitutis attriverat, libertatis viam, dum affligit, ostendat. Hæc itaque causa est quod ab injustis justis sinuntur affligi, ut, dum futura audiunt bona quæ diligunt, patiantur etiam mala præsentia quæ perhorrescunt, atque ad faciliorem exitum, dum amor provocat, cruciatus impellat. Tibi autem cum vitæ hujus undique prosperitas arrideret, non te mundus, qui blandiebatur,

impulit; sed speciosus forma præ filiis hominum (Psal. XLIV) Christus ad suæ dotationis amplexum per afflatum sancti Spiritus provocavit : « Surge, inquit, amica mea, sponsa mea, et veni: columba mea in foraminibus petrae, in caverna maceræ: ostende mihi faciem tuam, sonet vox tua in auribus meis: vox enim tuâ dulcis, et facies tua decora (Cant. II). » Anima quippe sancta jure Christi amica, et sponsa vocatur, quia illi per fidem dilectionemque conjungitur. Sed hæc sponsa quasi adhuc jacet, dum in mundanis actionibus implicatur; tunc surgit, cum ad procinctum divinæ servitutis erigitur. Ac si dicat: Quæ in sæcularis vitæ molliæ facies, jam surge, atque ad familiare contubernium meæ contemplationis erigere. « Columba mea in foraminibus petrae. » Si, juxta Apostolum, petra Christus est (I Cor. X), foramina petrae vultura sunt Redemptoris, quæ profectio non casu quinque sunt, lanceæ scilicet et clavorum; sed quia nos fueramus quinque sensuum vulneribus sauciati, per has quinque plagas salutis sumus perpetuæ restituti. Istæ siquidem portæ erant per quas diè Sabbati propheta, ne inferrentur onera gravia, prohibebat. In his ergo foraminibus Dei columba consistit, quia sancta quælibet anima totam propriæ salutis spem in sui Redemptoris passione constituit. Ibi velut ab accipitris incursu defenditur, quia a cunctis malignorum spirituum insidiis custoditur. Ibi plane nidificat, quia illic fetus honorum operum coacervat. De hac petra per Psalmistam dicitur: « Montes excelsi cervis, petra refugium herinacæis (Psal. CIII). » Quid enim hoc loco per montes, nisi altæ Scripturarum intelligendæ sunt profunditates? Hi nimirum qui jam dare contemplationis saltus noverunt, altos sententiarum divinarum vertices quasi cacumina montana conscendunt. Ad quæ profectio cacumina quia infirmi perlingere nequeunt, recte illic subditur: « Petra refugium herinacæis. » Quia videlicet invalidos quosque non intelligentia sublimis exercet, sed sola in Christo fides humiliter continet. Quod autem illic additur: « In caverna maceræ; » solent ex lapidibus maceræ fieri, ad custodiam vinearum; sicut per Isalam dicitur: « Vineam factam est dilectio meo in cornu in loco uberi, et maceriam circumdedit et circumfodit eam (Isai. V). » Quid ergo per maceriam lapidum, nisi præsidium et excubias intelligimus angelorum? Quibus videlicet anima in certamine posita, dum vallatur atque circumdatur, a cunctis adversantium spirituum tentationibus custoditur. Porro quod sequitur: « Ostende mihi faciem tuam; » tunc anima cœlesti Sponso faciem suam ostendere dicitur, cum ejus speciem internis obtulibus quasi revelata facie contemplatur. « Sonet, inquit, vox tuâ in auribus meis: vox enim tuâ dulcis, et facies tua decora. » O quam suave commercium, imo quam inenarrabilis dulcedo in humanis visceribus oritur! cum Creator et creatura alternis in se invicem affectibus delectantur, sicut per Prophetam dicitur: « Suavis sit

ei laudatio mea, ego vero delectabor in Domino (Psal. ciii). »

### CAPUT III.

*Quod quisque contemptor sæculi ad hoc debet semper eniti, ut perveniat ad amorem Dei.*

Et hæc est summa cujuslibet sanctæ animæ mundi nexibus expeditæ atque hic tota versari debet intentio, ut ad amorem Dei per omnium suorum operum incrementa contendat, et quandoque in veri Sponsi delectabiliter amplexibus requiescat. Sicut enim quis ad hoc ecclesiasticis gradibus initiatur ut ad sacerdotii culmen attingat, vel potius, ut tua dicamus, ad hoc virgo dotatione subarrhatur ut nubat, ita nimirum omnes sæculum relinquentes ad hoc debent semper eniti ut auctori suo valeant arctius in amore conjungi. Alioquin quid proderat jugum Ægyptiacæ servitutis abrumpere, Rubrum mare transire, si terram lactis ac mellis irriguam nunquam daretur intrare? Lac quippe fructus est carnis, mel labitur de supernis. Et quia Redemptor noster de cœlo veniens carnem suscepit ex virgine, hæc est terra illa viventium, ad quam debemus intentis semper amoris gressibus festinare. Hunc Sponsum, venerabilis soror, veræ charitatis ulnis amplectere, super hoc jugiter delectare, inquam, in Domino, et dabit tibi petitiones cordis tui (Psal. xxxvi). Hujus corpus et sanguinem etiam ore carnis crebrius suscipe, ut hanc ejus vocem merito possis audire: « Favus distillans labia tua, sponsa, mel et lac sub lingua tua (Cant. iv). » Terretur enim adversarius, cum Christiani labia Christi videt cruore rubentia. Agnoscit enim præsto suæ perditionis indicium, et divinæ victoriæ, qua captivatus est et obrutus, non tolerat instrumentum. Christus ergo per mysterium suum tibi videatur in ore, et Christus per sui amoris incendium tibi vivat semper in corde, ut congruat etiam tibi quod sponsa dicit in Canticis: « Fasciculus myrrhæ, dilectus meus mihi, inter ubera mea commorabitur (Cant. i). » Quid enim per myrrham, amarissimam videlicet aromatis speciem, qua etiam defunctorum cadavera condiuntur, nisi Christi passio designatur? Quid aliud inter ubera, nisi locus cordis agnoscitur? Quisquis igitur amore continuo Christum in arcano sui cordis amplectitur, quisquis imitandi gratia passionis mysterium jugiter meditat, huic profecto myrrhæ fasciculus Christus efficitur, atque, juxta Scripturæ sacræ sententiam, inter ejus ubera commoratur. Unde et idem Sponsus ad sponsam: « Pone me, ait, ut signaculum super cor tuum, ut signaculum super brachium tuum (Cant. viii). » Sæpe nos, ob rei memoriam quam oblivioni tradere nolimus, digito nostro vel brachio signum aliquod inodamus, ut, dum signum frequenter attenditur, res, quam intercipere potuisset oblivio, jugiter in memoria teneatur. Quisquis autem Christum quasi amat, sed operari bona dissimulat, jam quodammodo sponsum super cor signaculum posuit, sed super brachium omnino non posuit. Quisque vero bonis

operibus videtur intentus, sed a divini amoris torpet incendio frigidus; jam iste sanctitatis imaginem super brachium posuit, sed adhuc in corde Christi signaculum non expressit. Ut ergo sancta anima Christi caractere utrobique signetur, eum in corde suo signaculum ponat, ut amoris ejus facibus medullitus inardescat. Ponat etiam consequenter in brachio, ut piis operibus valenter insistat. Signaculum Paulus in corpore suo, velut in brachio, Jesum posuerat, cum dicebat: « Ego stigmata Jesu in corpore meo porto (Gal. vi). » Signaculum super cor Jesum posuerat, cum alibi gratulabundus aiebat: « Mihi autem absit gloriari, nisi in cruce Domini nostri Jesu Christi, per quem mihi mundus crucifixus est, et ego mundo! » (Ibid.) Cujus sane stigmata expressa gerebat in corpore, ejus se signaculum habere gloriabatur in mente. Porro autem et ipse cœlestis Sponsus, electum quemque suum sibi signaculum ponit, cumque grata vice, tanquam ne de memoria deleatur, attendit. Juxta quod Zorobabel duci Judææ pollicetur, dicens: « In illa die suspiciam te, Zorobabel serve meus, et ponam te sicut signaculum in conspectu meo (Aggæi ii). » Econtra, de quodam reprobo rege Dominus dicit: « Si fuerit Jechonias, filius Joacim regis Juda, annulus dexter in manu mea, inde evellam eum (Jer. xxii). »

### CAPUT IV.

*Exhortatio, ut in cœlestis Sponsi semper amplexibus requiescat.*

Ad hanc ergo tu, venerabilis soror, assidue vicissitudinem satage, ut et cœlestis Sponsus per amoris sui gratiam te semper accipiat, et tu ab eo (quod absit!) per amorem quorumlibet temporalium oculos non avertas; 773 quatenus et ille te subtiliter intueas, nullamque offensionis illuviem deprehendens, dicat: « Tota pulchra es, amica mea, et macula non est in te (Cant. iv); » et tu, ejus amore inenarrabiliter æstuans, hoc intimæ vocis depromas: « Dilectus meus candidus et rubicundus, electus ex millibus; caput ejus aurum optimum, guttur illius suavissimum, et totus desiderabilis (Cant. v). » Dilectus siquidem candidus virginitate, rubicundus est passione. Candidus, quia dicit: « Ego lilium convallium (Cant. i). » Rubicundus, de quo Joannes dicit: « Qui lavit nos a peccatis nostris in sanguine suo (Apoc. i). » Electus ex millibus; de quo Salomon: « Virum, inquit, de mille unum reperi (Eccl. vii). » Millenarius quippe numerus totius humani generis est intelligenda perfectio, in quo Salvator tanquam passer est unicus in ædificio (Psal. ci). Caput ejus aurum optimum, quia caput Christi Deus (I Cor. xi); qui nimirum, sicut aurum metallis, ita, licet incomparabiliter, omnibus supereminet creaturis. Cujus guttur suavissimum dicitur, quia suorum melliflua suavitate verborum mentes audientium obdulcantur. « Quam dulcia, inquit, faucibus meis eloquia tua! super mel et favum ori meo (Psal. cxviii). » Totus etiam desiderabilis, quia in eum, testante Petro, desiderant angeli prospicere

(1 Petr. 1); vel quia humanitatis ejus mysterium, omne desiderium accendit in mentibus electorum, ut eos videlicet non modo resurrectionis gloria provocet, sed ad imitationis exemplum ipsa quoque ignominia passionis invitet. In hoc igitur sponso tuo, veneranda soror, assidue delectare, in hoc omnia cordis tui vota constitue, in hujus semper amplexibus ab omni sopita mundi turbine requiesce.

#### CAPUT V.

*Ad cautelam provocat, ut contra tentationis insidias sit semper accincta.*

Sed interim, dum amplecteris sponsum, cavē solerter adversarium: adhuc enim in salo versaris, nec dum portus statione perfrueris. Procinctus enim iste castrorum non quietis est municipium; via est ista, non patria; ambulamus, et non habitamus. Tentatio enim est vita hominis super terram (*Job vii*). Quapropter si tentationum bella desunt, gaude quidem, noli tamen nimium secura confidere; sed adversus repentinos et inopinatos insidiatorum hostium impetus te vigilanter accinge. Sæpe namque nonnulli ad Deum de mundo conversi, in ipso suæ inchoationis aditu, pacatissimam carnis tranquillitatem cogitationumque percipiunt; procedente vero tempore, duris tentationum probationibus fatigantur. Quod utique fieri divina dispensatione cognoscitur, ne in ipso suæ novitatis initio tentationum asperitate frangantur. Nam si eos adhuc teneros ac intimi conflictus ignaros amaritudo tentationis exciperet, ad ea scilicet a quibus necdum longe discesserant, facile remearent. Unde scriptum est: « Cum emisisset Pharao populum, non eos deduxit Dominus per viam terræ Philisthiim, quæ vicina est, reputans ne forte poeniteret eum si vidisset adversum se bella consurgere, et reverteretur in Ægyptum (*Exod. xiii*). » Ex Ægypto itaque **774** recedentibus, e vicino pugna subtrahitur; quia derelinquentibus sæculum quædam pacis tranquillitas datur, ne, in ipsa teneritudinis novitate turbati atque conterriti ad ea quæ contempserant revertantur. Prius ergo securitatis suavitate mulcentur, prius pacis quiete nutriuntur; post cognitam vero dulcedinem, tanto jam tolerabilius tentationum certamina sustinent, quanto in Deo altius agnovere quod ament. Tu ergo sic in his quæ forte nunc prosperantur exultes; ut ab his quæ posterius imminent non dormites. Esto igitur cauta et undique circumspecta; sicque te præbe pervigilem ut nunquam te hostes inveniant oscitantem. Confœderanda sunt quippe adversum te et prosapia generis et flos ætatis, venustas formæ et memoria facultatis abjectæ. Ad evitanda sane istorum tela certaminum, nullus mihi videtur validior clypeus quam meditatio mortis ac extremi terror examinis.

#### CAPUT VI.

*De anima, cum egreditur, quibus dolorum anxietatibus coarctetur.*

Pensandum quippe est, cum jam peccatrix anima a vinculis incipit carnis absolvi, quam amaro terrore

conculitur, quantis mordacis conscientiae stimulis laceratur. Recolit vetita quæ commisit; videt mandata quæ negligenter implere contempsit. Dolet indulta poenitentiae tempora sese inaniter percepisse; plorat immobilem districtæ ultionis articulum inevitabiliter imminere. Manere satagit, ire compellitur; recuperare vult perdita, non auditur. Post terga respiciens, totius transactæ vitæ cursum velut unum brevissimum deputat itineris passum; ante se oculos dirigit, et infinitæ perennitatis spatia deprehendit. Plorat itaque, quia intra tam breve spatium acquirere lætitiâ potuit omnium sæculorum; deflet etiam, se propter tam brevis illecebræ voluptatem, inenarrabilem perpetuæ suavitatis amisisse dulcedinem. Erubescit, quia, propter illam substantiam quæ vermibus erat obnoxia, illam neglexit quæ choris erat angelicis inserenda. Jam radios mentis attollit, et cum divitiarum immortalium gloriam contemplatur, eam propter vitæ hujus inopiam perdidisse confunditur. Cumque sub se reflectit oculos ad hujus mundi convallem tetramque caliginem, super se miratur æterni luminis claritatem, liquido comprehendit quia nox erat et tenebræ quod amavit. O si redivivum poenitentiae tempus mereri potuisset, quam duræ conversationis [conversionis] iter arriperet! qualia et quanta promitteret! quantis se devotionum vinculis innodaret! Interea, dum hebescentes oculi contabescunt, dum pectus palpitat, rancum guttur anhelat, dentes paulatim nigrescunt et quamdam velut æruginem contrahunt; pallescunt ora, membra cuncta rigescunt; dum hæc itaque et hujusmodi tanquam vicinæ mortis præcedentia famulantur officia, adsunt omnia gesta simul et verba. Nec etiam ipsæ cogitationes desunt, et cuncta hæc amarum adversus auctorem testimonium reddunt. Coacervantur omnia ante respicientis **775** oculos, et quæ conspiceret refugit, coactus et invitatus attendit. Adest præterea hinc horrenda dæmonum turba, illinc virtus angelica. In illo, qui medius est, liquido deprehenditur cui parti jure possessio vindicetur. Nam si pietatis in eo videntur insignia, invitationis angelicæ blanditiis oblitur, atque harmonicæ melodiam dulcedine ut exeat provocatur; quod si eum sinistrae parti meritorum nigredo et foeditatis squalor adjudicet, intolerabili mox terrore concutitur, repentini impetus violentia perturbatur, præcipitanter invaditur, ac de miseræ carnis ergastulo violenter evellitur, ut ad æterna supplicia jam cum amaritudine pertrahatur. Jam vero, post egressionem de corpore, quis explicare valeat quot armatæ iniquorum spirituum acies in insidiis lateant, quot frementes cunei feralibus telis instructi iter obsideant, et, ne transire libera possit anima, velut militari more constipatæ legiones, oppugnant? Hæc et hujusmodi frequenter in corde versare, quid est aliud quam lenocinantia vitæ hujus blandimenta respuere, mundo repudium dare, illicet motus carnis elidere, solumque perfectionis adipiscendæ propositum indeclinabiliter custodire?

## CAPUT VII.

*Sententiæ Scripturarum de die iudicii.*

His addendus est etiam extremi terror iudicii, ut illius amaritudine valeat mundi hujus falsa dulcedo contemni. Ad evitandas namque diabolicæ pugnæ molestias valenter assurgimus, si necessitatis ultimæ periculum provide pertractemus. Nam si repentinus ille atque terribilis adventus Christi digne perpenditur, quid erit in mundo ubi mens humana vel desipiens delectetur? Ille nempe dies est ad quem omnium præcedentium sæculorum intentio ac summa colligitur, cui cuncta sacrarum Scripturarum volumina famulantur, de quo beatus Petrus, ut audientium corda digno terrore concuteret: « Adveniet, inquit, dies Domini sicut fur, in quo cœli magno impetū transient, elementa vero calore solventur (II Petr. III). » Unde et mox subdidit: « Cum hæc omnia igitur dissolvenda sint, quales oportet esse vos, in sanctis conversationibus et pietatibus expectantes, et properantes in adventum diei Domini, per quem cœli ardentes solventur, elementa vero ignis ardore tabescent? » (Ibid.) De quo et Judas dicit apostolus: « Ecce veniet Dominus in sanctis millibus suis facere iudicium contra omnes, redarguere omnes impios de omnibus operibus impietatis eorum, quibus impie egerunt, et de omnibus duris quæ locuti sunt contra eum peccatores impii (Jud. 1). » De hoc et Joannes in Apocalypsi: « Ecce veniet cum nubibus, et videbit eum omnis oculus, et qui eum pupugerunt, et plangent se super se omnes tribus terræ (Apoc. 1). » Et Malachias ait: « Ecce venit Dominus exercituum, et quis poterit cogitare diem adventus ejus, et quis stabit ad videndum eum? » (Mal. III.) Et paulo post: « Ecce dies veniet, succensa quasi caminus, et erunt omnes superbi et omnes facientes impietatem sicut stipula, et inflammabit eos dies **776** veniens, quæ non relinquet eis radicem et germen (Mal. IV). » Et per alium prophetam dicitur: « Adhuc unum modicum est, et ego commovebo cœlum et terram, et mare, et aridam, et movebo omnes gentes, et veniet desideratus cunctis gentibus (Aggæi VIII). » Item alius: « Juxta est dies Domini magnus, juxta, et velox nimis; vox diei Domini amara, tribulabitur ibi fortis, dies iræ, dies illa, dies tribulationis et angustiae, dies calamitatis et miseriae, dies nebulæ et turbinis, dies tubæ et clangoris (Sophon. I). » Ubi notandum, tremendi diem iudicii, quam proxime, quamque perniciousiter adventare propheta considerat, ad cujus agilitatem expressius inculcandam tot accelerandi nomina coacervat: ubi scilicet ad auxesim dictionis, bis ponit *juxta*, deinde *velox*, et *nimis*, ut liquido doceat quia oculis fidei id jam videtur in limine, quod infidelibus et cæcis corde putatur procul abesse: et isti jam tribunalibus iudicis quodammodo tremantes assistunt, quem illi per diuturnæ longinquitatis absentiam parvipendunt. De hoc ultimæ et irremediabilis necessitatis die præconatur Isaias, dicens: « Ecce dies Domini venit crudelis, et indignatione-plenus,

A et iræ furorisque, ad deponendam terram in solitudine, et peccatores ejus conterendos ex ea; quoniam stellæ et splendor earum non expandent lumen suum, obtenebratus est sol in ortu suo, et luna non splendet in lumine suo; et visitabo super orbem mala, et contra impios iniquitates eorum (Isai. XIII). » Et iterum: « Ecce, ait, validus et fortis Dominus sicut impetus grandinis, turbo confringens, sicut impetus aquarum multarum inundantium et enissarum super terram (Isai. XLVIII). » Idem alibi: « Ecce nomen Domini venit de longinquo: ardens furor ejus et gravis ad portandum, labia ejus repleta sunt indignatione, et lingua ejus quasi ignis devorans, et spiritus ejus velut torrens inundans ad perdendas gentes in nihilum (Isai. XXX). » Qui rursus ait: « Eritque repente confestim a Domino exercituum, visitabitur in tonitruo et commotione terræ, et voce magna turbinis et tempestatis, et flamma ignis devorantis (Isai. XXIX). » De quo videlicet igne Petrus ait: « Cœli autem qui nunc sunt, et terra, eodem verbo repositi sunt, igni reservati in die iudicii et perditionis impiorum hominum (II Petr. III). » De hoc et propheta dicit: « Auditam faciet Dominus gloriam vocis suæ, et terrorem brachii sui ostendet in comminatione furoris et flammæ ignis devorantis (Isai. XXX). » De hac etiam ultione tremenda per Moysen Dominus dicit: « Gladius meus manducabit carnes (Deut. XXXII). » De hac Jeremias ait: « Gladius Domini devorabit ab extremo terræ usque ad extremum ejus, non est pax universæ carni (Jer. XII). »

Gladius enim devorare terram dicitur, et pax universæ carni deesse perhibetur, quia quisquis nunc carnaliter conversatur, vel terrena immoderatus ambire convincitur, ultimæ districtiois necesse est gladio perimatur. De quo nimirum gladio per Ezechielem Dominus dicit: « Egredietur gladius meus de vagina sua ad omnem carnem ab Austro usque ad Aquilonem; ut sciat omnis caro quia ego Dominus eduxi gladium meum de vagina sua irrevocabilem (Ezech. XXI). » De hoc utique gladio et Amos propheta dicit: « In gladio morientur omnes peccatores populi mei, qui **777** dicunt, non appropinquabit, et non veniet super nos malum (Amos, IX). » Hic divini iudicii terror interiores Nahum prophetæ aures turbaverat, cum dicebat: « Vox flagelli, et vox impetus rotæ, et equi frementis, et quadrigæ ferventis, et equitis ascendentis, et micantis gladii, et fulgurantis hastæ, et multitudinis interfectæ, et gravis ruinæ, nec est finis cadaverum (Nahum, III). » Enimvero de divino iudicio quid viderit Daniel, manifeste describit, dicens: « Aspiciebam, donec throni positi sunt, et antiquus dierum sedit, vestimentum ejus quasi nix candidum, et capilli ejus quasi lana munda; thronus ejus flamma ignis, rotæ ejus ignis accensus; fluvius igneus rapidusque egrediebatur a facie ejus (Dan. VII). » Et paulo post: « Iudicium sedit, et libri aperti sunt (Ibid.). » Qui nimirum libri, ipsi intelligendi sunt sancti, quorum nunc meritum

ab eis per custodiam humilitatis absconditur, et tanquam volumen codicis, ne legatur, involvitur. Tunc autem, ad eorum gloriam, universorum oculis aperitur; ut in eis prævaricatores tanquam per digestæ scripturæ articulum legant divinæ legis mandata, quæ, dum adviverent, servare contempserant. Illic jam compelluntur et legere, qui hic per arrogantiae fastum verba Dei dedignabantur audire. Illic jugum Domini leve, et onus ejus suave mitibus (*Matth. xi*) et patientibus fuisse considerant, quod hic superbiam suam cervicibus intolerabile judicabant. Illic superbum omne confunditur, et quidquid elevatum fuerat, sub tantæ majestatis indignatione curvatur. Unde per Isaiam dicitur: « Oculi sublimes hominis humiliati sunt, et incurvabitur altitudo virorum. Exaltabitur autem Dominus solus in die illa; quia dies Domini super omnem superbum et excelsum et super omnem arrogantem, et humiliabitur; et super omnes cedros Libani sublimes et erectas, et super omnes quercus Basan, et super omnes montes excelsos, et super omnes colles elevatos, et super omnem turrinam excelsam, et super omnem murum munitum, et super omnes naves Tharsis, et super omne quod visu pulchrum est; et incurvabitur sublimitas hominum, et humiliabitur altitudo virorum, et elevabitur Dominus solus in die illa, et idola penitus conterentur; et introibunt in speluncas petrarum et in voragines terræ a facie formidinis Domini et a gloria majestatis ejus, cum surrexerit percutere terram (*Isai. ii*). » Quæ nimirum verba seriatim fortassis exponerem, nisi epistolaris compendii regulam excedere devitarem. Illud dumtaxat summotenus video perstringendum; quia rebus insensibilibus dies divini judicii dicitur imminere; sed per figuras rerum ratione carentium, stoliditas intelligitur hominum reproborum. Cedri quippe Libani sublimes et erectæ, potentes sunt hujus sæculi, per excellentiam quidem terrenæ sublimitatis elati, sed honorum operum fructibus infecundi. Quercus autem fructus quidem proferunt, sed non quibus homo reficitur; sed unde sues aluntur. Sues autem immundi intelligendi sunt spiritus, qui spurcis sordentium hominum operibus saginantur. Porro montes excelsi et colles elevati (*Psal. lxxv*), superbi quique sunt, quasi per aggestum tumidæ cogitationis in alta porrecti; sed frumento, quo valles abundant, cunctisque spiritalium studiorum frugibus alieni. Jam vero turris excelsa et murus munitus illos insinuat qui, cum peccatores sint, in quadam se velut innocentiae arce constituunt, seseque defensionis clypeo contegentes, reprehensorum suorum jacula ad se pertingere non permittunt. Tharsis autem *exploratio gaudii* dicitur. Quisquis enim, in hoc sæculo, unde gaudere possit explorat, huic superveniens dies Domini, quibus perpetualiter amarescat, mœroris atque tristitiæ molestias irrigat. Venit etiam dies Domini non super omne quod pulchrum est, sed super omne quod visu pulchrum est; quia ille divini judicii

A pondere premitur, qui intrinsecus quidem vitiorum latenter ingruentium deformitate confunditur, foris autem quadam adumbratæ virtutis vel potius honestatis pulchritudine palliatur. Sed cum plurima suppetant, nos enucleatius exponere ista postponimus, quia prolixioris styli laciniam devitamus. Exempla quoque de divini terrore judicii plura his supersedemus inserere, quia cum huic tremendo examini omnis eloquii cœlestis intentio militet, nos in exaggeratione ejus elaborare diutius non oportet. Ad hoc enim pleniter intimandum, etiam si cætera cuncta deessent, sola illa Veritatis verba sufficerent, quibus ait: « Erunt dies illi tribulationis tales quales non fuerunt ab initio creaturæ quam condidit Deus, usque nunc, neque fient » (*Marc. xv*).

## CAPUT VIII.

*Hic admonetur ne sub pietatis specie ad sæculum revertatur.*

Tu autem, domina mea, domina, inquam, mea, imo et regina, Domino meo, cœlesti scilicet regi, per anulum vivæ fidei et arrham sancti Spiritus desponsata: tu, itaque hæc et his similia, quæ de divini furoris et indignationis amaritudine leguntur mundi amatoribus imminere, crebrius perlege, subtiliter meditare; ut hoc velut amaræ confectionis antidoto sibilos antiqui serpentis ejusque lethale virus possis evadere. In memetipso quippe frequenter expertus sum quia, cum visceribus meis hujus cogitationis amaritudo diffunditur, a cunctis male blandientis mundi, ut ita loquar, humoribus, mentis meæ stomachus exsiccat. Sæpe enim malignus spiritus, velut avis in ramo arboris, sic in lingua ponitur adulantis, et tanquam per organum vasis, in vas virus effluit, quod lethaliter in audientis interiora transfudit. Tu autem obtura aures malesuadis cantibus Sirenarum, et Scyllæ voraginis prudenter evade naufragium; sicque cor tuum in sancto proposito terror-judicis figat, ut nequaquam hoc ventus assentatorii favoris evellat. Antiquus enim ille seductor, qui dudum Evæ per serpentem versutiæ suæ virus involvit (*Gen. iii*), adhuc fortassis et tibi tanquam filiae morem servans, per aliud suum vasculum sibilabit: Revertere, inquit, domum sub ipso sacræ professionis habitu, rege familiam, expone pie vivendi formam, tene super filium ejusque cœvos gravitatis ac modestiæ disciplinam, provide lapsuro non absonam legibus sponsam, nec resilire permittas sibi obsequentium clientelam. Hæc igitur fabricans nequitiae spiritus non curat qua te ad sæculum retrahat veste, dummodo confidat quod per sæculares actus tibi principetur in mente.

## CAPUT IX.

*De monacho, qui de eremo ad cœnobium rediens, per immunditiam lapsus interiit.*

Porro autem, cum plurima suppetant, id potissimum, quod nobis ante paucos dies contigit, referre congruum judicamus. Monachus quidam simplici

naturæ humilisque modestiæ nobis aliquando cohabitaturus adhæsit, ac per octennium fere nobiscum in eremo non solum caste, sed, juxta fratrum quoque omnium testimonium, laudabiliter vixit; et, quoniam scribendi peritus exstitit, non pauca nobis librorum volumina pollucibiliter exaravit. Nuper autem, cum obeso vegetus corpore ac robustior solito videretur, cœpit obstinate deprecari ut ad suum permitteretur monasterium remeare. Quod nimirum malignus cordi ejus intulit adversarius, ut perspicue postmodum ipsius rei declaravit eventus. Nam mox, ut, juxta petitionem, ad suum monasterium est reversus, cum alio quodam monacho dierum malorum sene, litteris æque perito, atque librario, per femoralis fluxus egestionem cecidit; sicque omne quod mundus diutius vixerat, repentina sceleratissimi criminis contagione fœdavit; neve sine vindicta tam plectibilis culpa transiret, ægritudine mox irruente, decubuit, paucisque deinceps diebus ex hac vita confessus et confusus exivit. Sic, sic igitur, qui stat videat ne cadat (*I Cor. x*). Et qui solo præcepto, cum uxore Loth, post terga respicere non veretur, conspecto saltem salis statunculo (*Gen. xix*), ac Deo desuper vindice terreatur.

## CAPUT X.

*De sepultura Sophiæ marchionissæ, et ejus fetore intolerabili.*

At fortassis econtra dicitur quia corpusculum tuum gracile nimis et delicatum, ab ipsis lactantis infantie rudimentis esculentissimis ac pene regalibus fuit epulis molliter enutritum; nec sororum potes nunc mensulis esse contenta, quæ magnificis olim fueras ferculis assueta; sed nec olere quidem, vel communibus cum eis uti potes eduliis, quæ marinas exquisitasque delicias Indicis assueveras infercire pigmentis. His itaque male blandientibus suadelis, imo litis melle sagittis ex diabolica pharetra manifeste vibratis, tu discipula Crucifixi prudenter occurre, easque a te conditionis tuæ sedula consideratione repelle. Perpende igitur quia caro, quæ nunc accuratis dapibus enutritur, paulo post vermibus scaturire compellitur; ipsaque tunc fit esca rodentium, quæ nunc delectabiliter saginatur jucunditate ciborum, ac tanto graviolem exhalat putrefacta fetorem, quanto suaviorem sibi procuravit **780** educata mollitiem. Ecce, dum ista conscribimus, Sophia nobis ad memoriam redit, duorum scilicet marchionum, Uguzonis soror, Rainerii filia, quæ ante hoc fere sexennium, dum sana adhuc esset et incolumis, abbatem monasterii sancti Christophori martyris ut sibi sepulturam construeret petiit; illoque renitente, eamque delirare perhibente, difficiliter impetravit. Factumque intra monachorum claustra sepulcrum mox ut ingressa conspexit, nescio quo judicio, in ægritudinem corruit, ac paulo post abortiit, et obiit. Cujus profecto tumulus cum esset gypseus, artificiosisque cæmentariorum studiis undique communitus, tantam fetoris illuviem per continui circiter anni circulum exha-

lavit, ut tolerari vix posset, nec fratres quiescere in tota illius claustrum medietate permetteret. Et cum multa circumquaque sepulcra subsiderent, eademque minora satis impendia percepissent, nullum, præter hoc solum, molestias naribus ingerebat, ut luce clarius innotesceret quoniam humana caro quanto tenerius ac mollius educatur, tanto deterius in putredinem ac nauseam vertitur. Enimvero fratres cum me cur id fieret inquisissent, quod videbatur, exposui: Hoc, inquam, ut opinor, ad salutem vestram divinitus agitur, ut in illo uno corpore quod tam pulchrum venustumque vidistis, quid etiam de cæteris mulieribus in tentatione luxuriæ sentiri debeat, liquido colligatis; quoniam caro illa et tunc putredo veraciter erat cum ad se spectandam lubricos intuentium oculos provocabat; quid enim tunc fuerit, nunc evidenter ostendit. Et quælibet hominis caro, quæ nunc vivere conspicitur, nequaquam de se post obitum putredinem generat; sed, quæ semper fuerat, tunc se tantummodo putredinem manifeste declarat.

## CAPUT XI.

*De Veneti ducis uxore, quæ prius nimium delicata, demum toto corpore computruit.*

Sed, ad id quod asserimus roborandum, congruum est ut etiam de viva carne proferamus exemplum. Veracis itaque et honesti viri didici relatione quod narro. Dux Venetiarum Constantinopolitanæ urbis civem habebat uxorem, quæ nimirum tam tenere, tam delicate vivebat, et non modo superstitiosa, sed artificiosa, ut ita loquar, sese jucunditate mulcebat, ut etiam communibus se aquis dedignaretur abluere; sed ejus servi rorem cœli satagebant undecunque colligere, ex quo sibi laboriosum satis balneum procurarent. Cibos quoque suos manibus non tangebatur, sed ab eunuchis ejus alimenta quæque minutius concidebantur in frusta; quæ mox illa quibusdam fascinulis aureis atque bidentibus ori suo, liguriens, adhibebatur. Ejus porro cubiculum tot thymiamatum, aromatumque generibus redolebat, ut et nobis narrare tantum dedecus feteat, et auditor forte non credat. Sed omnipotenti Deo quantum hujus femine fuerit exosa superbia, manifesta docuit ulciscendo censura. Vibrato quippe super eam divini mucrone **781** judicii, corpus ejus omne computruit, ita ut membra corporis undique cuncta marcescerent, totumque cubiculum intolerabili prorsus fetore complerent; nec quispiam tantam perferre narium injuriam potuit, non cosmeta, non servulus, vix una duntaxat ancilla, non sine speciei redolentis auxilio, in ejus obsequii sedulitate permansit. Eadem tamen raptim accedebatur, et protinus fugiens abscedebatur. Diutius igitur hoc languore decocta et miserabiliter cruciata, amicis quoque lætantibus, diem clausit extremum. Quid ergo sit caro, doccat ipsa caro; quodque perhibet mortua, testatur et viva.

## CAPUT XII.

*De suppliciis damnatorum.*

Sed, o utinam qui ejusmodi sunt, sic poena temporalis afficeret, ut non eos etiam tartarus exspectaret! Illic enim, juxta quantitatem gaudii retribuitur mensura tormenti; quantoque hic altius per jactantiam tumoris extollitur, tanto illic voracis incendii barathro profunditus absorbetur. Unde est quod de perversa anima sub Babylonis specie dicitur: « Quantum se exaltavit, et in deliciis fuit, tantum date illi tormenta et luctus (Apoc. xviii). » Et alibi: « Potentes potenter tormenta patientur, et fortior erit cruciatio (Sap. vi). » Nam et ipsæ carnales illecebræ, vel cætera vitia, quæ hic pravos homines inflammabant, illic in picem resinamque vertuntur, et ultricibus flammis vires tribuunt. Plane sicut B Scriptura dicit (Job x), illic est umbra mortis, quæ profecto nihil est aliud nisi obscuritas divisionis [visionis]; quia damnatus quisque cum æterno igne succenditur, ab interno lumine tenebratur. Natura vero ignis est ut ex se ipso et lucem exhibeat et ardorem, sed transactorum illa ultrix flamma vitiorum habet ardorem, non habet penitus lucem. Unde est quod de illo, quem a se repellit, Veritas dicit: « Ligat illi manus et pedes, et mittite eum in tenebras exteriores (Matth. xii). » Si ignis itaque, qui reprobos cruciat, lumen habere potuisset, is, qui repellitur, nequaquam mitti in tenebras diceretur. Hic etiam Psalmista ait: « Super eos cecidit ignis, et non viderunt solem (Psal. lvii). » Ignis enim super impios cadit; C sed sol, igne cadente, non cernitur, quia illos, quos gehennæ flamma devorat, a visione veri luminis cæcat, ut et foris eos dolor combustionis cruciet, et intus poena cæcitatatis obscuret; quatenus qui auctori suo corpore et corde deliquerunt, simul corpore et corde puniantur; et utrobique poenam sentiant, qui, dum hic viverent, pravis suis delectationibus ex utroque serviebant. Unde bene per prophetam dicitur: « Descenderunt ad infernum cum armis suis (Ezech. xxxi). » Arma quippe peccatorum sunt membra corporis, quibus perversa desideria, quæ concipiunt, exsequuntur. Unde recte per Paulum dicitur: « Neque exhibeatis membra vestra, arma iniquitatis peccato (Rom. vi). » D Cum armis vero descendere ad infernum, est cum ipsis quoque membris, quibus desideria voluptatis expleverunt, æterni judicii tormenta tolerare, ut 782 tunc eos undique dolor absorbeat, qui nunc suis delectationibus subditi, undique contra justitiam juste judicantis pugnant. Quæ tamen supplicia in se demersos et ultra vires cruciant, et eis vitæ subsidium extinguendo servant; ut sic vitam terminus finiat, quatenus semper sine termino cruciatus vivat; quia et ad finem per tormenta properat, et sine fine deficiens durat. Fit ergo miseris mors sine morte, finis sine fine, defectus sine defectu; quia et mors vivit, et finis semper incipit, et deficere defectus nescit. Erant ergo nunc luxuriæ

PATROL. CXLV.

A dediti, et ad propriæ carnis arbitrium vivant, ut anima postmodum et carne simul intereant; nunc medullas mundanæ dulcedinis sorbeant, ut repleti tunc perpetui cruciatus absynthio totis visceribus amarescant (Job xxi). Necesse quippe est ut illic dentibus strideant, qui hic edacitate gaudebant; illic ab eis irremediabiliter plangitur, a quibus hic voluptuose ridetur: quique hic olfaciunt nidores aromatum, et acredinem inhiant pigmentorum, illic eos et sulphureus fetor excruciat, et terra picei fumi caligo circumdat. « Ducunt enim in bonis dies suos, et in puncto ad inferna descendunt (Num. xiv). »

## CAPUT XIII.

*Quod monachus frigidus vilis alga; monachus autem fervidus, vitis est fructuosa.*

Verum hæc illis exaggeranda sunt mentibus, quæ post terga relictam Ægyptum repetunt, quæ sedere super ollas carnum ignobiliter concupiscunt (Exod. xvi), ut his cogitationum fluctibus terrorumque procellis quodammodo mare Rubrum fiat, quod eis in medio, ne revertantur, obsistat. Tu autem, veneranda soror, quæ scilicet evangelicæ quadrigæ ac rotarum coelestium animalia sequeris, quorum sunt pedes recti (Ezech. i), quæque, cum ambulant, non revertuntur; nequaquam, ut pro certo confidimus, Loth sequeris uxorem (Gen. ix), sed Annæ potius imitaberis stabilita virtutem, cujus scilicet vultus non sunt amplius in diversa mutati (I Reg. i). Et quoniam quod ab adulate laudatur, ab ecclesiastica auctoritate contemnitur, utramque hanc perpende sententiam. « Laudatur peccator in desideriis suis, et qui inique egerit, benedicitur (Psal. ix); » hoc adulantis est. « Maledicti, qui declinant a mandatis tuis (Psal. cxviii); » hæc Ecclesiæ vox est. Quod autem in reprobos, juxta quantitatem criminis, æqua sit etiam mensura maledictionis, testatur propheta David, qui nimirum in Judam Iscariotem triginta maledictiones intulit, sicut ille Dominum triginta argenteis sacrilega venalitate distraxit. Quarum videlicet sicut prima est: « Constitue super eum peccatorem, » sic extrema est illa: « Operiantur sicut diploide confusione sua (Psal. cviii); » quas si quis per psalmi seriem subtiliter quærat, certum est quoniam non eas ultro citrove reperiat. In serie Scripturarum disce consequenter et ordinem rerum. Prius enim lex scribitur, deinde historia, textitur Judicum, postremo liber ponitur Regum; quoniam hic divinæ legis mandata perficimus, postmodum ad judicium venimus; ad extremam; si causa non 783 dissonat, cum Christo sine fine regnamus. Hi proventus afferendi sunt segetum, qui coelestibus horreis inferantur. Vitis plane si sit ferax uvarum, cuncta præcellit arbusta silvarum; sin vero sit sterilis, cæteris judicatur abjectior ac vilior esse virgultis. Unde est, quod ad prophetam divina vox ait: « Fili hominis, quid fiet ligno vitis ex omnibus lignis nemorum quæ sunt inter



signa silvarum? nunquid tolletur de ea lignum, ut fiet opus, aut fabricabitur de ea paxillus, ut dependeat in eo quodcumque vas? » (*Ezech. xv.*) Sic profecto monachus, si ad proferendos fructus boni operis sit intentus et fervidus, nihil inter homines eo valet esse præstantius; alioquin si frigidus, et infecundus arescat, ac dormiens stertat, jure tanquam vilis alga despicitur, et ipsis quoque sæcularibus non æquatur. Si quis vero studiis adipiscendæ perfectionis infervet, sed adhuc tamen per infirmitatem de prioris vitæ vitiis intus aliquid retinet: sæcularis quispiam, licet religiosus esse comprobetur et pius, nequaquam est huic per omnia comparandus. Melius quippe est vitiosum aurum quam æs purum; et pretiosius est hebes margaritum quam marmor parium; pallens quoque carbunculus amabilior est quam cæruleus sit hyacinthus. Tu quoque si, velut in auroræ diluculo constituta, de pristina vitæ tenebris adhuc in te aliquid sentis, noli diffidere, pervenire celeriter ad plenitudinem lucis. Cave tantummodo ne in carnis mollitie requiescas, sed in sanctæ disciplinæ laboribus te vigilanter exerceas.

## CAPUT XIV.

*Quod Dominicus duodecim simul psalteria cum disciplina cantavit, et tertium decimum cœpit.*

Utinam daretur tibi nunc dominum meum videre Dominicum, qui quod nos imperitæ linguæ conamur officio, ipse te efficaciore luculentissimæ vitæ doceret et informaret exemplo. Hic denique a tribus jam circiter annorum lustris lorica ferrea vestitur ad carnem, duobus autem ferreis circulis in corpore cingitur, duobus item per brachiorum arcos arctatur. Sed quia de illo in aliis nostris opusculis jam plura digessimus, nunc quod vix ante sex dies ad nos veniens retulit proferamus. Ait itaque: Contigit me nosse quod scripseris novem me uno die psalteria decantasse cum corporalibus disciplinis; quod certe cum audivi, tremefactus expavi, et conscientia remordente congemui; væ, inquam, mihi; ecce hoc de me; nesciente me, scriptum est; et tamen utrum hoc a me fieri potuisset ignoro. Ergo rursus experiar, et an hoc implere potuerim indubitanter agnoscam. Quarta igitur feria me vestibus exui, et armata scopis utraque manu, totam noctem duendo pervigilem, psallere ac me verberare non destiti, donec die altero, decursis duodecim ex more psalteriis, die tertio decimo ad psalmum: « Beati quorum (*Psal. xxxi*), » usque replavi. Porro, quod nobis durum sæpe videtur et asperum, quam ille puerile deputet ac despectum, uno doceamus exemplo. Frater **784** quidam cum se scoparum ictibus nimis abhorreret atterere, atque ut ipse sibi plagas inferret atque perferret, gravissimum iudicaret; tandem tamen domini Domini crebris insistenti, adhortationibus acquievit, ac per modulationem totius psalterii, et insuper quinquaginta psalmorum, sibi disciplinam inferre propriis manibus non cessavit. Erat autem

A nox illa præcedens Dominicam diem et B. Michaelis festivitatem. Cumque facto mane ad prædictum senem frater ille venisset, timensque ne de indiscretionem redargueretur, quod egerat, per ordinem retulisset; hac ille voce respondit: Noli, frater, pusillanimus esse, vel pro hac tua, quæ nunc est, infirmitate diffidere; potens est enim Deus ex imis te ad altiora provehere, et tanquam lacteolæ tuæ conversationis infantiam ad juvenilis roboris incrementa firmare. Et adjiciens ait: Nos etiam primo pedetentim cœpimus, sensimque ad quod nos divina pietas perducere voluit, licet imbecilles ac fragiles, educti sumus. Sicque factum est ut non eum de immoderato fervore, sicut ille timebat, argueret; sed ne desperationi succumberet, tanquam qui minimum quid egerit, animum refoveret. Hujus itaque sancti senis exemplo faciendæ disciplinæ, mos adeo in nostris partibus inolevit, ut non modo viri, sed et nobiles mulieres hoc purgatorii genus inhianter arriperent. Nam et relicta Tethaldi, sublimis utique generis et non infimæ dignitatis, mihi aliquando retulit, per præfixam hujus disciplinæ regulam centum annorum se poenitentiam peregisse.

## CAPUT XV.

*De cœlestis Hierusalem beatitudinis sempiterna.*

Tu itaque libenter audi semper facta bonorum, vel si imitari potes, cumulum sibi perpetuæ retributionis acquirant; vel si impossibilia sunt, uberius te in humilitate custodiant. Erigatur spiritus ad ea quæ promittuntur in patria, ut exsiliens parvipendat quidquid asperitatis horret in via. Cum pondus auri radiantis attenditur, labor itineris levigatur. Ubi loco præmii corona proponitur, stadii cursus alacriter transitur. Perpende igitur quam beatus sit qui, cum tanta reproborum multitudo repellitur, ipse ad nuptiale convivium ingredi, cum splendida electorum societate, mereatur; quantæ dignitatis sit adesse semper obtutibus Conditoris, contemplari præsentissimæ speciem Veritatis; facie ad faciem Deum cernere, choris angelicis interesse: ubi sic præsentibus quique gaudiis sunt repleti, ut de futura nunquam sint adversitate solliciti: ubi dum quieta mens incircumspecti luminis amœnitate perfruitur, de suorum quoque concivium præmiis inenarrabiliter gratulatur. Illic vitæ fontem et sitientes hauriunt, et haurientes sitiunt; quia ibi non potest, vel aviditas passionum gignere, vel satietas fastidire. Ex eo plane, quod auctori vitæ semper assistunt, omnem vim beatitudinis trahunt. Hinc floridæ juventutis æterna viriditas, hinc venustas est pulchritudinis, et indeficiens vigor incolumitatis. Ex illo itaque **785** que æternitatis fonte percipiunt, ut æternaliter vivant, ineffabiliter gaudeant: et, quod est longe præstantius, ad ejusdem Conditoris similitudinem convalescant. Sicut enim Joannes evangelista testatur: « Cum apparuerit, similes ei erimus, quoniam videbimus eum sicuti est (*I Joan. iii*). » Tunc mors absorpta est in victoria (*I Cor. xv*); omnisque humanæ naturæ funditus corrumpit corruptela. De hac

porro civitate sanctus ille Tobias aiebat : « Portæ Hierusalem ex sapphiro et smaragdo ædificabuntur; et ex lapide pretioso omnis circuitus murorum ejus; ex lapide candido et mundo omnes plateæ ejus sternentur; et per vicos ejus alleluia cantabitur (*Tob. xiii.*) » De hac et Joannes ait : « Quia singulæ portæ ejus erant ex singulis margaritis, et platea civitatis aurum mundum; tanquam vitrum perlucidum (*Apoc. xxi.*) » De qua etiam mox adjecit : « Quia non eget sole, neque luna; sed claritas Dei illuminabit eam, et lucerna ejus est agnus (*Ibid.*) » Ibi præterea natura humana, quæ vitiata fuerat, cunctis passionum squaloribus defæcata tripudiat, et azyma facta, in suæ puritatis atque sinceritatis munditia perseverat. Cum spiritu siquidem, et caro spiritualis facta, concordat; ac totus homo sui Conditoris arbitrio in nullo penitus dissonat. Tunc impletur quod sponsæ sponsus eloquitur : « Veni, sponsa mea, tempus putationis advēnit (*Cant. ii.*) » Surculus enim cum putatur, remanente quod utile est, abscinditur quod superfluum est. Sic ex humana natura manet quidem omne quod Conditor fecit; tollitur autem quod diabolus addidit. Illic arcana singulorum patent oculis omnium. Illic omnium mentes in mutui amoris unione conflatae, nulla invicem varietate dissentiunt; sed in communi voluntatis studio omnes unanimiter fœderantur. Apud nos, cum una festivitas colitur, altera non habetur; illic autem omnium solemnitas semper est coacervata lætitia, quia illi præsentibus assistunt, qui sollemnitas sunt procul dubio causa. Deest illic ignorantia, deest impossibilitas; quia in **786** Sapia, cui uniti sunt, cuncta sciunt; in Omnipotente omnia possunt. Illic revelata facie contuebimur, quomodo Pater ineffabiliter Filium gignat, quomodo Spiritus sanctus ex

A utroque procedat. Illic videbimus quomodo is, qui nusquam deest, non per partes, sed totus ubique est, quomodo etiam fieri possit, ut et intendat singulis tanquam vacet ab universis; intendat universis tanquam vacet a singulis; quomodo is, qui cœlestibus præeminet, abyssi fundamenta sustentet; qui mundi intima penetrat, quomodo exteriora cuncta circumdat. Illic odoris suavitas cunctorum excedit vires aromatum, omnem superat fragrantiam pigmentorum. Illic beatorum aures harmonicæ dulcedinis organa melodia permulcent. Illic pratis jucunda satis amœnitate vernantibus, candentia lilia nunquam decidunt, rosæque purpureæ cum croceis floribus non marcescunt. Et certe de illa cœlestis Hierusalem beatitudine senipiterna incomparabiliter plus est in re quam mens possit humana concipere; plus mente concipitur quam ullis sermonibus explicetur. Quid ergo plura de illis beatorum civium gaudiis eloquar? Quandoquidem eorum felicissimæ voluntati cuncta prorsus elementa deserviunt, et cuncta ad eorum nutum, omnia ad eorum vertuntur arbitrium. Vera quippe est sententia illa qua dicitur : « Omnia quæcunque voluit Dominus, fecit in cœlo et in terra; in mari et in omnibus abyssis (*Psal. cxxxiv.*) » Et quod de capite dicitur, de membris quoque illius dignum est ut credatur. His te gaudiis, venerabilis soror, Deus omnipotens introducat, ipseque tibi sit præmium, cum assumit, qui factus est pretium, cum redemit. Commenda me Moysi, et Aaron ducibus tuis, sanctis videlicet Vitali et Rodulpho presbyteris (26); qui videlicet noverint, quia idcirco, contra morem epistolæ, titulos inseruimus, ut inelinati atque prolixi styli duplex fastidium levaremus.

*Sit nomen Domini benedictum.*

(26) De Vituli et Rodulpho vide epistolam 14, libri v.

## 787-788 OPUSCULUM QUINOUAGESIMUM PRIMUM.

### DE VITA EREMITICA, ET PROBATA EREMITIS.

ARGUMENTUM. — Teuzonem monachum, mox sanctitate insignem, qui ab abbate dissentiens, e monasterio discesserat, et ipsum sanctum doctorem, qui una cum eodem abbate ut eos invicem reconciliaret, ad se venerat, post multas contumelias, tandem e cella expulit, mansuetudinem et modestiam traducere conatur; dum ei tantæ superbix causas et fontes exponit: nimirum, quod sub nullius disciplina, sed tanquam sibi ipsi præceptor, monasticæ vitæ institutum sectatus; quodque, cum eremitam profiteretur, in media tamen urbe et sæcularium multitudine vitam traduceret. Igitur, ne singulare vivendi genus sequatur, admonet: quod quam perniciosum sit, monachorum quorundam tristi exitu probat. Discretionis quoque freno cohibendas esse monachorum actiones ostendit. Ac demum, ne de seipso tam præclare sentiens, alios contemnat, virtutes ei quorundam ante oculos ponit, qui tamen modestissimi erant, nec ut ille, se efferebant. Tandem ut ei humilitatis exemplum præbeat, veniam ab illo petit, si quid asperius fortasse a se dictum videatur.

Domno TEUZONI eremitæ PETRUS peccator monachus resumendæ charitatis aculeum.

Minus se proximum amare convincitur, qui perlatæ læsionis injuriam sic in auctorem expostulare dissimulat, ut omnino se sub silentii censura con-

D stringat. Nam dum sibimet quasi ex virtute patientiæ consulit, lapsa fratri salutiferæ correptionis manum porrigere parvipendit; dumque patientiæ immoderatæ deservit, imminutæ charitatis sententiam non evadit. Non enim dicit Dominus: Si peccaverit